

# **A represión franquista en Galicia**

Actas dos traballos presentados ao  
**Congreso da Memoria**

Narón,  
4 a 7 de decembro de 2003

**A represión franquista en Galicia**

Actas dos traballos presentados ao Congreso da Memoria  
Narón, 4 a 7 de decembro de 2003

COMITÉ CIENTÍFICO  
Enrique Barrera Beitia  
Eliseo Fernández Fernández  
Xosé Manuel Suárez  
Manuela Santalla López

Reservados todos os dereitos desta edición para  
Asociación Cultural Memoria Histórica Democrática  
<http://memoriahistoriademocratica.org>

1ª edición: maio 2005

Deseño e maquetación: Edicións Embora  
Ilustración da portada: Alberto Toval

Depósito Legal:

## O silencio ou a represión do sentimento

Luís Martínez-Risco Daviña

¡Outra vez, outra vez o terror?  
Un día e outro día,  
sen campás, sen protesta.  
Galicia ametrallada nas cunetas  
dos seus camiños.  
Chéganos outro berro.  
Señor, ¿que fixemos?  
–Non faledes en voz alta–  
¿Hasta cando durará iste gran enterro?  
–Non chores que poiden escoitarte.  
Hoxe non choran máis que os que aman a Galicia–.  
¡Os milleiros de horas, de séculos,  
que fixeron falla  
para faguer un home?  
Teñen que se encher aínda  
as cunetas  
con sangue de mestres e de obreiros.  
Lama, sangue e bágoas nos sulcos  
Son semente.  
Chove.  
¡Negra sombra, negra sombra?  
Eu ben sei que hai un misterio na nosa terra,  
máis alá da néboa,  
máis alá do mar,  
máis alá da chuvia,  
máis alá do bosque

*Luís Pimentel<sup>1</sup>*

### Cambedo

Cambeo é unha pequena aldea da fregresia de Vilarelho da Ráia no concello portugués de Chaves. Antigo povo promiscuo,

integrado no estado portugués por mor do *Tratado de Lindes* asinado o 29 de setembro de 1869 en Lisboa polos gobernos español e portugués<sup>2</sup>. Pese a esta nova realidade social, política e económica, até hai poucos anos, –nos que a presenza dos respectivos estados é máis tanxíbel nestas zonas marxinais–, as relacións de veciñanza cos habitantes de Oimbra (concello galego co que limita) a penas sufreron alteración algunha. Terra de baixa montaña, non moi rica, cruzada por camiños milenários que, de sempre, foron usados polos veciños para esa actividade comercial que é o contrabando; e, como acontece con outras poboacións da raía seca, a facilidade de cruzar a fronteira e atopar refuxio seguro en terras nas que ninguén pregunta, fixo deste territorio lugar seguro como base de operacións da guerrilla e para buscar cobixo da represión franquista. E nin sequera isto é novidade para os veciños acostumados, en épocas de convulsión política, ao ir e vir de refuxiados, quer portugueses quer españois.

Mais todo mudará no 21 de decembro de 1946, cando esta pequena poboación foi rodeada por efectivos armados españois e portugueses<sup>3</sup> que someteron á aldea a un asedio con fogo intenso (morteiros incluídos) durante máis de 24 horas para capturar a tres guerrilleiros nela refuxiados; Demétrio García (capturado e condenado a prisión en Tarrafal por un Tribunal Militar portugués), Juan Salgado e Bernardino García (mortos na acción punitiva) Con certeza que o acontecido en Cambedo foi un acto de barbárie, desgraciadamente habitual no período de entreguerras (cando se instalaron na Península Ibérica as dictaduras de corte fascista), e que a propaganda política se encargou de lexitimizar en base ao simplismo branco-preto para que fose asumido pola poboación como unha medida eficaz para se desfacer dun adversario político que non merecía condescendencia algunha.

A dona Silvina, na altura unha nena, unha ráfaga tronza-lle unha perna. As forzas que cercaban a aldea non permiten o seu traslado a Chaves para ser atendida. Hoxe comenta, que menos mal que tiraran baixo.

Dona Aurora, hoxe unha velliña encantadora, veu como morreron uns veciños cos que mantiña unhas fortes relacións de amizade. Alguén, non sei se con fundamento, comenta que fora enamorada do Juan. O que si sei é que ela dí que eran boa xente.

Dona Manuela, irmá de Demétrio e casada no Cambedo, non foi capaz de superar o seu horror. Feita presa por ser irmá do Demétrio perdeu o seu fillo de 18 meses no cárcere de Porto. Os guardans tiveron a xentileza de negar-lle o dereito a saber onde enterraran o seu menino. Non sei se aínda vive. A única vez que lle ouvín contar a súa historia foi no curso de verán *Estratégias de cola-*

*boração na ráia durante a guerra e pós-guerra espanhola: 1936-46* celebrado en Chaves, Montalegre e Celanova en xuño de 1993. Foi incapaz de concluír o seu relato. Coma ela, o seu home coñeceu prisión. E tamén o pai dela e do Demétrio, quen acudira o día anterior a axudar na matanza do porco. Cousas do destino!

Domingos Fernandes do Espírito Santo, militar natural de Cambedo e que se negou participar no asedio, coñeceu prisión militar. Coma outros veciños, que aquí non imos nomear<sup>4</sup>, e que fixeron que Cambedo teña a honra de ser a poboación portuguesa con máis veciños presos polo salazarismo a causa da súa solidariedade cos refuxiados, que non só cos guerrilleiros, do terror franquista.

E non soamente os veciños coñeceron a represión. Tamén diversos elementos da Guarda Fiscal e militares portugueses que non se quixeron implicar no asedio, serán expulsos do corpo ou, no mellor dos casos, transferidos a outros puntos da xeografía portuguesa.

O sorprendente é que practicamente até 1993 o trágico suceso estive-se silenciado. Pertencia ao espectro máis íntimo dos habitantes de Cambedo. Non é que non se soubera do asunto<sup>5</sup>, mais os veciños non falaban publicamente del. Xa tiñan sofrido dabondo, e a súa dor era o seu segredo. Estamos, pois, perante dun deses casos nos que o silencio das vítimas fai impune a acción do agresor que, por riba xustifica a súa acción por defender aos bos cidadáns daqueles outros, os veciños de Cambedo, que deron cobixo, que non acollida, a uns simples malfeitores e bandoleiros. O opositor político fica desprestixiado, reducido socialmente á categoría de delincuente, e o cidadán que o acolle de encubridor. Perversión da realidade que vai alén do moralmente aceptábel.

Ora ben, o silencio non é duradeiro. A restauración dos sistemas democráticos nos povos da Península Ibérica, favorece que se poida indagar sobre os sucesos dos que ninguén fala. Xa dixemos que no caso de Cambedo, Bento da Cruz recupera para a literatura o suceso. Mais poderíamos correr o risco de que ficara convertido nun simple relato dunha novela inspirada nesa época.

A este feliz suceso, o da publicación e éxito de público da novela de Bento da Cruz, debemos engadir a aparición en cursos e revistas de traballos referidos aos sucesos de Nadal de 1946 en Cambedo. Sendo esencial o labor de investigación da antropóloga Paula Godinho, a quen debemos que o *silencio* do Cambedo fose coñecido alén dos lindes da aldea. Paula realizou ao longo dos anos 1986-1987 un traballo de campo en Cambedo, anos nos que mantivo un intenso convívio cos veciños. Esta circunstancia fixo que fose aceptada coma un deles, polo que poido ser partícipe dos

*siléncios* que pertencían á memoria colectiva desa pequena comunidade. En 1988 contrasta e completa a información oralmente recibida dos *seus veciños*, con datos obtidos nos arquivos da PIDE, o que lle permite reconstruír o grupo de *o Juan*. Os resultados da súa investigación son apresentados nunha comunicación no curso de verán *Estratégias de colaboración na ráia durante a guerra e pós-guerra española: 1936-46* e publicado posteriormente na revista *A Trabe de Ouro*<sup>6</sup>. Deste suceso, pouco se trataba na historiografía galega sobre a Guerra e Posguerra Civil. Unha simple referencia nas obras de Hartmut Heine<sup>7</sup> e Luís García Mañá<sup>8</sup>, na que Juan Salgado Ribeiro é membro da partida de Demétrio<sup>9</sup> pertencente á *II Agrupación del Ejército Guerrillero de Galicia*, responsabeis do asalto do coche de línea Verín-Ourense, así como do asasinato o 28 de setembro de 1945 de Antón Aguirre Padrón, xefe da Falange en Vilaza-Verín. Tamén temos unha referencia ao cerco do Cambedo na obra de Fernandes Alves *O Barroso* e a *Guerra Civil de España*, na que relaciona o cerco de Cambedo co asalto en Vila da Ponte da camioneta Braga-Chaves na véspera da feira de Santos en 1946.

Mais desde entón, e pouco a pouco, o silencio foi substituído polo recoñecemento público da acción solidaria dos veciños e o comezo da recuperación da memoria histórica deste desgraciado suceso da nosa pos-guerra que, como ben podemos observar, trascende as fronteiras do estado español para, grazas á colaboración do outro rexime fascista da Península Ibérica, levar o sufrimento e a dor alén da ráia e lixar con xuízos e penas de cárcere o bo nome dos habitantes daqueles povos raianos solidarios coas vítimas do golpe de estado de 18 de xullo de 1936. Unha primeira acción no proceso de recuperación histórica do cerco de Cambedo, foi o propio curso de verán ao que fixemos referencia, e no que os veciños poideron falar libremente e en voz alta do seu caso. Un segundo paso foi a homenaxe realizada co gallo do 50<sup>a</sup> aniversario do asedio, no que un nutrido grupo de galegos, principalmente ourensáns, acudimos a Cambedo o 21 de decembro de 1996 para colocar unha placa conmemorativa en agradecemento a sufrimento dos veciños. Desde entón, diversas excursións e roteiros de recuperación da memoria histórica achegaron-se a Cambedo para visitar o que fora refuxio dos loitadores antifranquistas. E se todo vai como se pretende, no vindeiro abril de 2004 a *Asociación de Amigos da República* de Ourense renderá homenaxe público en Auria aos veciños de Cambedo como exemplo da acción solidaria que os habitantes dos povos da ráia mantiveron para cos seus conveciños.

No que a min respecta, coñecer e ser partícipe (non sei en que grao de responsabilidade) de que se rachara o muro do silencio,

fixo-me reflexionar sobre a súa importancia como elemento activo da represión e ser, máis aínda, solidário coas vítimas da Guerra Civil.

### O silencio das vítimas

Unha cuestión que afecta ás sociedades, e as sociedades contemporáneas non són excepción, é a función da memoria colectiva. No poema de Luís Pimentel *Cunetas*, escrito no ano 1937, xa temos referencias a un dos aspectos, no meu entender, máis trágicos que coñeceron os derrotados sobrevivintes da Guerra Civil. O non falar en voz alta do que lles aconteceu, non fose ser... O silencio como cómplice dunha represión perfectamente programada para amilantar as resistencias que se poidesen articular na retagarda, foi, e en casos aínda é, un dos aspectos máis sinistros do terror que sobre os contrários aplicou o réxime franquista e que até conseguiu pervertir a realidade invertindo a visión dos acontecementos. Pensemos na visión que se ofrece da leal Galiza, que fai que até practicamente hoxe se realice unha análise da presenza en Galiza do conservadurismo<sup>10</sup> como algo inherente á praxe política dunha Galiza que se alinea no bando rebelde dende que principia o Alzamiento, descoñecendo-se en gran parte do estado español do que aquí realmente pasou. Actua o silencio dos que coñeceron a represión desde o mesmo inicio do franquismo.

A Guerra Civil non se pode simplificar no existencial por ser un proceso absolutamente personalizado, tanto para aquel que o sufriu como para os seus descendentes máis directos. Falando da súa experiencia nos lager, os campos de extermínio nazís, dicía Primo Levi que de pouco serven as ideas xerais para a comprensión dos casos particulares<sup>11</sup>. E salvando as distancias, non moitas, o mesmo podemos aplicar para comprender máis intimamente o que aconteceu a partires do 18 de xullo de 1936 e ter a xentileza como historiadores de non limitar o estudo da represión da Guerra Civil a unha simple estatística de represaliados, ou á elaboración dunha casuística de modelos e formas de represión. A dor das vítimas non se merece esa frialdade que algún historiador alegaría no nome da obxectividade. Se o investigador da represión quere comprender o seu alcance, penso eu que cando menos ten a obriga moral de saber o que sentían as vítimas e tentar de ser solidário co seu sufrimento e non se limitar a albiscá-lo desde a distancia. Para iso debemos deixar de relegar á categoría de simple *instrumento* aos que a padeceron e non limitarmos a re-escribir a Guerra Civil desde a perspectiva da conquista do poder, que si o é.

Por moito que pro-homes do franquismo, como Gonzalo Fernández de la Mora, consideren que a Guerra Civil foi froito da explosión ideolóxica da época e da ineficacia política da II República<sup>12</sup>, as súas repercusións psicolóxicas alcanzan, incluso, ás xeracións que non vivimos a guerra, mais que dalgunha maneira sofrimos as súas consecuencias no vivir cotiá e familiar. E non ten porque sorprender que os que non vivimos directamente os acontecementos esteamos impregnados dos seus horrores, toda vez que o franquismo puxo especial empeño en eliminar, ou cando menos marxinar social e economicamente, ao vencido pois, e non o esquecemos, a represión, dada a ausencia de argumentacións políticas que poidan convencer ao discrepante, é o único recurso de lexitimización do poder que posúe un réxime que ten a súa orixe nun acto violento como foi o golpe de estado de 18 de xullo de 1936. Resulta triste contemplar a realidade de que o franquismo é o único dos rexímenes fascistas da Europa anterior a 1936 nado dunha guerra, –presente na sociedade española até, polo menos, a morte do xeneral–, e que non pode procurar unha xustificación a súa existencia en certo respaldo electoral que dera lexitimidade e cobertura aparentemente legal ás súas decisións posteriores. Algo que si podería argumentar até o propio Hitler. É quizais por isto, por ser un réxime xurdido da violencia, tentará borrar da memoria dos españois calquera vestixio dos logros sociais e cívicos conquistados, pese ás convulsións que coñeceu, durante a II República.

O silencio motivado polo medo, consecuencia da feroz represión, é unha dificultade que se nos impón para dislumbrar, se iso fose posíbel, a dimensión humana e cal foi a alcance real da Guerra. A destrución de numerosas probas e testemuños documentais que permitirían unha aproximación ao foron as relacións persoais durante os primeiros anos do franquismo<sup>13</sup>, fan da documentación oral, na que a memoria é peza clave, unha ferramenta imprescindible para o investigador. Mais as *resistencias* a abordar pública e abertamente o tema, xunto cos *esquecementos*, con certeza terapéuticos, conseguiron, entre outras moitas causas, facer que a Guerra Civil sexa unha gran descoñecida para gran parte da xuventude actual.

O medo ao terror, –até hai pouco presente no silencio daquelas xeracións (atrevería-me a propór un punto de inflexión nos nados en 1959-60) que coñeceron do que era capaz a represión exercida polo franquismo–, era un elemento presente en moitas familias españolas que non ousaban comentar, nalgún caso nin na propia intimidade familiar, o que para eles supuxo perder a Guerra. De xeito que o silencio actúa de auto-censura, incidindo na participación política de gran parte da cidadanía. O Réxime, a falla de lexitimi-



midade moral que xustifique a súa existencia, acada unha aquiescencia refrendada polo silencio imposto a calquera tipo de oposición e que tiña como única finalidade a de manter-se no poder a toda costa e empregando todos os mecanismos de represión ao seu alcance; até había viúvas de represaliados temerosas de amosar publicamente o seu loito! Aínda que todas estas situacións *kafkianas* non evitan que a megalomania do dictador, –adulado por aqueles que ben por evitar sospeitas de deslealdade ou por se promocionar no sistema–, considerara as uas decisións como desígnios da Providencia.

Mais, e non teñamos dúbida, que o silencio, nalgún caso, non foi respectado na intimidade de moitos fogares. E sen necesidade de falar do acontecido, simplemente ollando para o que acontecía nas casas dos vencedores, o silencio que pretendeu impór unha submisión baseada no terror, deu lugar ao resentimento, cando non ao rencor. Polo tanto, podemos considerar que a represión, lonxe de silenciar vozes para propiciar o esquecemento, mantivo vivo o ideal da liberdade. E a historia non pode facer de *árbitro*, pese ao esforzo de decididos e emprendedores colegas de que así sexa. Xa dixemos que estamos a traballar cunha temática que produciu dór e a nosa obriga moral, penso eu, é reconstruír esa dór e non soamente obxectivizar as causas que a produciron.

### **Silencio e memoria: problemas metodolóxicos e o risco da involución**

Comenta Juan José Carreras<sup>14</sup> que ao rematar a II Guerra Mundial, as autoridades de ocupación prohibiron en Alemaña o ensino da historia; e cando se volveu autorizar, houbo docentes que se negaron a explicá-la. Aquí non acontece o mesmo, mais pode-se apreciar certa incomodidade de abordar un tema que, a pesares do paso do tempo, no podemos considerar fechado ao ser moitas, e moi fondas, as feridas que dexiou abertas. Recoñezamos que o da Guerra Civil é un tema no que dificilmente se cumpre o requisito rankian de que a historia pode-se facer e escribir sen odio e sen amor. Se reflexionamos un pouco, decatáremosnos que a Guerra Civil é un instrumento de defensa-ataque que aínda se emprega na dialéctica cando non hai recursos ideolóxicos que ofrecer ao contrario: Onde estaba vostede no 36? Se non hai resposta positiva conforme á orientación ideolóxica do que inquire, o contrario fica moralmente desautorizado. Esta confrontación ten certa lóxica se consideramos que, xunto ao discurso oficial, existe un discurso de *resistencia* elaborado polos que tras o 1 de abril de 1939 ficaron *silenciados* e postos fora do sistema. Discursos que, non só, ofrecen unha

visión contraposta das causas, finalidade e consecuencias da Guerra Civil, senón que, tamén, levan implícitas visións diferentes do mundo desde o plano moral, económico, social,...

Ao querer afondar na problemática dos siléncios e das memorias, o investigador atopa-se con que o corpus teórico de traballos relacionados coa memoria colectiva é escaso, polo que dar resposta a certas problemáticas metodolóxicas esixe un alto grao de esforzo reflexivo sen ter a garantía de que a solución adoptada sexa a correcta. Na reconstrución do que foi a Guerra Civil debemos, necesariamente, partir da memoria que dela teñen os que a sufreron. Mais, como acontece en todo fenómeno colectivo, os distintos membros da colectividade non teñen necesariamente idéntico recordo dos mesmos feitos, xa que o paso do tempo actúa arbitrariamente segundo cada quen, ben de filtro ben de potenciador, de determinadas vivencias. Debemos aceptar como *verídicas* as lembranzas de cada un? Por que considerá-las *falsas* se estas contradín o asumido como certo por amplos colectivos? Teñamos en conta que as lembranzas son un fenómeno psíquico fortemente individual e, aínda que sexa nese nivel individual, o posuidor dese retallo de memoria viviu gran parte da súa vida na certeza de que as súas lembranzas teñen fundamento en episodios realmente vividos. Por outra banda, o carácter selectivo da memoria é capaz de borrar, incluso na colectividade, aqueles sucesos que polo seu traumatismo deixaron aberta unha fenda na sociedade. Mais tamén é certo que ese esquecemento excluínte non necesariamente ten porque ser perpétuo, e ben pode acontecer que cando as circunstancias son propicias emerxe de novo e dá un significado diferente ao sentir desa comunidade. Xa vimos o que aconteceu en Cambado.

No estudo da contemporaneidade, especialmente a máis próxima a nós, podemos falar coa xente, interiorizar no seu ánimo, facer un esforzo, como historiadores, en achegar-mos as realidades sociais presentes e comprender cales son as súas dinámicas, para o que é preciso superar o pre-conceito de que debemos deixar pasar un tempo prudencial para analizar obxectivamente os acontecementos históricos. Esa necesidade de alonxamento temporal non debería ser precisa na medida en que asumamos que o discurso histórico é unha construción ilustrada, un produto cultural derivado dunha reflexión filosófica sobre o ser humano e que, como historiadores, podemos ocupar-nos de cuestións esenciais para a análise do presente. Asemade, precisamos incorporar á nosa metodoloxía novos recursos que poidan ofrecer a información que precisamos. A dificultade radica en saber dar o seu xusto valor a esas novas fontes de información como son as testemuñas orais,

deseños gráficos, filmes, fotografías, novelas, banda deseñada,... E no caso que nos preocupa neste traballo, o da Guerra Civil, consideramos fundamentais as testemuñas orais que aínda se poidan obter dos que a viviron.

O problema é que tratamos a información oral coma se fose un documento máis, e aínda que aplicamos a crítica, negamos a reflexión. Para que a información oral acade con plenitude o que dela demandamos, debemos partir da premisa de que a oralidade permite escapar do silencio, polo tanto do anonimato, a todas aquelas capas da poboación, –as máis desfavorecidas e maioritarias nas máis das sociedades–, que carecen doutros mecanismos de expresión subsceptíbel de perdurar máis no tempo. A oralidade, deste xeito, converte-se nun mecanismo de identidade cultural que permite a estas capas desfavorecidas da poboación poder loitar polo recoñecemento futuro das súas problemáticas. Penso que para acadar un maior éxito, os historiadores non debemos reparar en recorrer a metodoloxías propias doutras disciplinas, caso da antropoloxía ou da socioloxía que permiten ao historiador, en especial ao contemporanista, acadar unha visión da realidade social *máis próxima* da que acostuma ter pola súa formación académica e metodoloxía de investigación.

Á dificultade metodolóxica de inquerir no que poida haber de certo na memoria dos supervivintes, debemos engadir unha dificultade maior: a de pescudar nos silencios, en ocasións intencionados, tanto dos que queren esquecer a dor, coma daqueles que non queren lembrar que foron causantes desa dor. E quen di o silencio, di a memoria colectiva. Eles, os antropólogos e os sociólogos, máis acostumados a traballar neses edios das intimidades, e o da Guerra pertence a ese ámbeto, poden proporcionar-nos as ferramentas que os contemporanistas precisamos para afondar no mundo da memoria e vencer os silencios que dificultan a reconstrución duns determinados acontecementos. A historia de cada acontecemento é re-escrita en base a diferentes experiencias, e a memoria forma parte do mundo das experiencias. A antropoloxía ben pode lembrar-nos que a sociedade está constituída por diferentes camadas que non están illadas unhas das outras.

Por outra banda, precisamos coñecer a realidade social na que se suceden os acontecementos en estudo. Que no caso que nos ocupa estamos perante dunha sociedade tan complexa e con sistemas de valores tan contra-postos, –nas relacións de clase, nas diferencias xeo-culturais, na concepción relixiosa, no posicionamento político, nas diferencias rural-urbano–, que caseque poderíamos considerar que debemos analizar sociedades diferentes que se ven afectadas por un mesmo suceso. E na comprensión desta

análise sería de boa axuda acudir á socioloxía na procura daquelas ferramentas que nos axuden a unha mellor comprensión da sociedade en estudo.

Os medios audiovisuais e o xornalismo, –xa non como fonte documental, que tamén<sup>15</sup>, e si como instrumento metodolóxico para achegar-mos a lugares e situacións que a metodoloxía tradicional da investigación histórica non é capaz de penetrar–, tamén poden aportar novos eidos nos que o historiador se poderá submerxir na procura da verdade, no seu afán académico-profesional de contribuír na construción da memoria. Teñamos presente que o xornalismo moderno non se limita a describir os sucesos, senón que busca reflexionar sobre as causas que deron lugar aos mesmos. E esta reflexión, o xornalista non a fai desde a distancia que supomos dá o tempo histórico, senón que aborda a problemática desde a preocupación social que existe sobre un determinado problema e coma nós, non o negaremos, estará influenciado pola súa particular visión do mundo respostando a súa opinión, en especial nas editoriais, a unha determinada ideoloxía.

Non esquezamos que a humanidade non está composta por heróes, senón por homes e mulleres que na súa inmensa maioría, e se deles dependé-se, evitarian os sofremetos e penalidades que viviron neses intres que para os investigadores teñen un certo ár épico. Polo que é fundamental a aprendizaxe da metodoloxía precisa para que a recolla de historias de vida, que paseniño imos adoptando os contemporanistas, sexan unha fonte documental co valor que se merece, toda vez que é o instrumento que permite dar voz a inmensos grupos afastados da historia oficial por cuestións de clase, disidencia política ou relixiosa, pertenza a minorías étnicas,...

Unha outra dificultade que atopamos ao pretender afondar na Guerra Civil, é que é un tema de memorias e silencios fortemente confrontados desde xa antes do inicio do conflito, e que os case 40 anos de Paz, ou deberíamos dicir Victoria?, non conseguiron cicatrizar.

O da Guerra Civil durante moito tempo foi unha cuestión inter-xeneracional; na medida en que foron sucesivas as xeneracións que tiveron en común a presenza da Guerra, ao que contribuíu notabelmente as diversas conmemoracións (18 de julio paga extra incluída), desfile de la victoria, morte de Jose Antonio, Alcazar de Toledo...), coas que o réxime reafirmaba o seu poder omnipresente á sociedade española. Transmiten-se, de forma especial, as repercusións da Guerra, que se reflicten nunhas determinadas pautas de conducta, máis particularmente no referido ás repercusións que ten a disensión respecto do poder establecido.

Foi, pois, a Guerra un elemento aglutinante que xunguiu a diversas xeracións dado que o seu impacto alcanza aos que non a viviron, mais que sofren os traumas daqueles que viviron os anos de terror ao compartir os valores e sistemas de aprendizaxe impostos polo bando vencedor que, ademais, tenta impór unha memoria determinada dos sucesos non só da Guerra, senón que incluso, tamén, dos sucesos previos ao 18 de xullo de 1936 e dos posteriores ao 1 de abril de 1939. E a función da escola foi fundamental nesa *patriótica* misión de educar aos españois nos principios da España eterna. Mais nalgún caso, cando as familias ousaban trasgredir o silencio, as historias de vida dalgún familiar actuaban como *correctoras* da verdade oficial prosusamente difundida polo aparato propagandístico instaurado dende o mesmo día do golpe de estado polos sublevados e que, non temos outro remedio que recoñece-lo, demostrou a súa eficacia ao longo dos anos de vixencia do réxime.

Cando a situación política permite falar libremente do acontecido, e supostamente o silencio xa non é un mecanismo de defensa e supervivencia, rachan-se os vínculos xeneracionais e a Guerra Civil deixa de pertencer ao mundo do silencio para entrar nos domínios do esquecemento. Expliquemo-nos, aos máis da miña xeneración, por suposto aos máis vellos ca min, *aprenderon-nos* que a Guerra Civil, a GUERRA, foi unha medida necesaria para rematar co desorden e o caos imperante ao longo da II República, especialmente desde o triunfo do FP (*del comunismo y de la masonería internacional se preferimos a terminoloxia en vigor na altura*). Co paso do tempo, e grazas ao labor historiográfico de homes en nada sospeitosos de desafección co réxime, como por exemplo Ricardo de la Cierva, aprendimos, ao tempo que semellaba que o réximen aceptaba-o, iso de que *todos fuimos culpables*, mais sen deixar de xustificar e tentar de lexitimizar o réxime ao que tanto debían. E cando na Transición Democrática parecía que, por fin!, se faría *xustiza histórica* e asumir publicamente que o *Glorioso Alzamiento* en realidade foi un golpe de estado propiciado polos sectores fascistas e reaccionarios da sociedade hispana, a Guerra Civil fica silenciada, –de novo o silencio–, por temor a despertar vellos rencores. Se antes dixemos que os vencedores impoñen unha determinada memoria dos acontecementos que van da pre-guerra á pos-guerra, agora non hai rubor en tentar impór, en aras da concórdia, un esquecemento da memoria colectiva que fora alimentando-se na clandestinidade ao longo dos anos da Dictadura.

Debemos recoñecer que a Guerra, as súas consecuencias, non foron superadas. Na Restauración Democrática, os vencidos non tiveron ocasión de perdoar publicamente as aldraxes (quer físicas, económicas, morais ou intelectuais) recibidas por parte dos

vencedores. Lonxe diso, os vencedores, en certo modo, esixiron o esquecemento. Ao que boa parte dos vencidos accederon, de novo se lles impón o silencio, para evitar unha involución golpista que poidese traer o terror. Fixemo-nos, o silencio actúa de maneira sibilina na memoria colectiva. Pese non se falar publicamente da represión exercida polo réxime do xeneral Franco, a memoria colectiva funciona e busca unha saída defensiva para garantir a creación, pese ás súas eivas, dun sistema democrático. Incluso, aínda que de forma indirecta, cando a restauración da democracia o que se fai con medidas como a amnistia ou certos dereitos concedidos aos perdedores, –caso do cobro de pensións por parte de militares republicanos ou das súas viúvas–, é perdoar aos vencidos. Non hai, agás raras excepcións, unha petición de perdón por parte dos vencedores. Aspecto este, creo eu, que fecha en falso a pretensión, non dubidamos que ben intencionada, de reconciliación.

Certo que cando se traballa sobre espazos de tempo tan próximos para xustificar o non querer abordar o problema desde unha perspectiva histórica, podemos recorrer a problemas de perspectiva, de limitacións e/ou atrancos para acceder a determinado tipo de documentación, de sentirmos, en certo modo, involucrados cos acontecementos en estudo. Mais tamén é certo que dispomos das vantaxes que supón o poder traballar coa liberdade de crear os nosos sistemas metodolóxicos que, na medida do posíbel, permitan desde o presente achegar-mos á verdade, toda vez que o noso compromiso como historiadores é o de camiñar con decisión na procura desa verdade. Quizais por iso resulta certamente triste observar como se emprega esa liberdade para recorrer a unha determinada terminoloxía que ofrece ao lector unha visión distorsionada de determinadas actitudes, nalgún caso potenciando o carácter morboso que ten a represión e sen se parar a reflexionar no que supuxo como instrumento de acción política e, aínda menos, no que significou para as persoas e familias que a padeceron. Ao falar de represión non nos limitamos aos asasinatos selectivos ou indiscriminados, ás estadías en campos de concentración, á redención de penas por traballo. Represión foi tamén a privación esporádica da liberdade, a negación da liberdade de movemento, a separación do posto de traballo até non ter superados os procesos de depuración (especialmente graves no funcionariado, e máis particularmente nos diferentes corpos docentes) medida que supuxo para os afectados, aínda no caso de superá-los exitosamente, graves perxuízos para as economías domésticas. Sen falar, xa, do agrávio moral que sofriu ou submetido a depuración: Se ficaba absolto,

seria colaborador co réxime? De non superaba plenamente, e aínda que só fose amonestado, poderíamos tratá-lo coa mesma liberdade que antes ou estaríamo-nos expoñendo ao perigo de ser investigados pola nosa relación cun *desafecto*? Unha represión que non se precisa exercer só derramando sangue ou privando de liberdade. Na escola, no púlpito, nas formas de evasión e lecer, na rádio ou no cinema, atopamos difentes modos de represión. Por non falar da miséria económica na que se viviu durante unha pos-guerra máis longa do desexábel e que, con certeza, supuxo un mecanismo máis de represión que minaba na ética e moralidade de moitos que para subsistir non tiveron outra solución que recorrer a prácticas, lindando no delictivo, que anos antes nin sequer serían quen de imaxinar. O recurso ao estraperlo é o exemplo máis *inocente* que podemos citar.

Volve-se falar de foraxidos e bandoleiros para se referir aos que fuxiron da represión franquista e, sobre todo, para os que tiveron o valor de facer fronte aos seus horrores. Dá-se unha imaxe edulcorada das misérias dos anos de pos-guerra loubando a asistencia social do franquismo esquecendo, quen sabe se intencionadamente?, que esa beneficéncia non sería necesaria de terse acatado a legalidade vixente que, no caso da II República, estaba refrendada por unhas eleccións gañadas democraticamente polos partidos integrantes do FP. Xa custa traballo que en certos sectores da dereita se fale de golpe de estado para se referir ao que fixeron os militares sublevados o 18 de xullo de 1936. Fala-se de radicalización das forzas da esquerda republicana para xustificar o golpe militar do 36, esquecendo que a esquerda republicana foi exemplarizante na mesura coa que aplicou toda unha serie de medidas que tiñan como finalidade modernizar as estruturas socio-económicas do estado español. E respostando os brotes de violencia aos intentos da dereita, entre 1932 e 1934, de reconducir a República anulando gran parte dos avances sociais acadados pola cidadanía e recollidos nunha Consitución modélica no referente á modernidade dos seus postulados e que, por fin!, rescataba ao estado español dos resquícios feudalizantes que a Restauración Canovista non fora quen de eliminar.

Unha violencia silenciada é o que foi o franquismo. Permitan-me, a modo de colofón, unhas verbas de Manuel Azaña, Presidente lexítimo da II República, emitidas na rádio na noite do 23 de xullo de 1936: *En estos momentos de violencia, cuando se ha desencadenado contra el Poder legítimo de la República una agresión sin ejemplo, yo no diré una palabra más de violencia*<sup>16</sup>.

Quen sabe?, pode que xa comezara o silencio.



## Notas

<sup>1</sup>A cursiva é nosa . Pimentel Luís. *Cunetas*. Lugo. Marzo de 1937. En Costa Clavell, Xavier *Las dos caras de Galicia bajo el franquismo*. Cambio-16. Madrid. 1977.

<sup>2</sup>Quen quera afondar nos povos promíscuos, e en xeral no significado da ráia seca luso-galaica, recomendamos a lectura das obras de Luís García Mañá e Máximo Salinas Valencia citadas na bibliografía.

<sup>3</sup>As testemuñas falan duns 1.000 efectivos armados entre Guardia Civil española, Guarda Nacional Republicana, Guarda Fiscal e forzas de infantaría con morteiros procedentes de Chaves.

<sup>4</sup>Quen estea interesado pode ler o seu testemuño no nº 17 de A Trabe de Ouro.

<sup>5</sup>Na obra de Bento da Cruz, *O lobo guerrilleiro*, hai referencias a este suceso que o propio Bento da Cruz recoñece ter escoitado de novo na súa aldea de Padornelos, no veciño concello de Montalegre. Así o comentou nunha cena coloquio con Mendéz Ferrín no curso de verán *Estratégias de colaboración na ráia durante a guerra e pós-guerra española: 1936-46*. Repitiu estes mesmos argumentos nunha mesa redonda sobre *Montalegre e a Guerra Civil Española* celebrada na Cámara Municipal de Montalegre o 15 de febreiro de 1997. Posteriormente, en abril de 1998, volverá recordá-los nunha visita guiada polos espazos xeográficos nos que transcorre a novela cos alumnos de COU do IES-Universidade Laboral de Ourense.

<sup>6</sup>“O grupo de o Juan e a Importancia da rede social”. En A Trabe de Ouro nº 16. Santiago de Compostela. 1993.

<sup>7</sup>Heine, Hartmut. A guerrilla antifranquista en Galicia. Serais. Vigo.1980.

<sup>8</sup>García Mañá, Luís. La frontera Hispano-Lusa en la provincia de Ourense. Anexo 11 del Boletín Auriense. Museo Arqueológico de Ourense. 1988. Para Luís García Mañá, Juan Salgado era un contrabandista de wolframio e o situa en Vinhais, onde operaban outros grupos guerrilleiros.

<sup>9</sup>Demétrio tiña contactos en Cambado. Unha irmá súa estaba casada alí. Único guerrilleiro feito prisioneiro tras o asalto, será xuzgado e condenado a prisión en Tarrafal (Cabo Verde). En 1965 é liberado, exiliando-se en París. Os outros dous guerrilleiros, Juan Salgado e Bernardino García, morren no asedio, e os seus cadáveres serán expostos no cemiterio de Chaves. Paula Godinho. Op. Cit.

<sup>10</sup>Como se Madrid, Rioja, Cantábría, Levante, non estean gobernadas polo PP.

<sup>11</sup>Primo Levi. *La tregua*. Muchnik editores. Barcelona. 2001.

<sup>12</sup>Curiosamente, desde o revisionismo operante nos últimos anos, coincide-se, en certo modo, cos criterios do que fora ministro franquista.

<sup>13</sup>Lembremos que numerosos Libros de Actas numerosos concellos teñen arrancadas (pensamos tras a Restauración Democrática) as follas correspondentes a decisións adoptadas desde o 18 de xullo de 1936 a ben entrada a década dos 40 e incluso 50.



<sup>14</sup>Carreras Ares, Juan José. *Razón de Historia*. Marcial Pons. Zaragoza. 2000.

<sup>15</sup>Non podemos esquecer a inmemnsa cantidade de información que podemos recoller da prensa, aínda que, tal vez, en certos casos sexa preciso *ollar* para as novas que se recollen nun xornal desde unha perspectiva diferente da de só procurar unha reseña coa coplementar unha información documental que, por tradición historiográfica, consideramos máis relevante. Lendo o xornal podemos saber como se pensaba. E no caso que nos ocupa, a auséncia nas páxinas do xornal de determinados sucesos que, por outras vías sabemos que si aconteceron, ou a redacción que se dá a outros sucesos, pon-nos en relación diercta coa aplicación do silencio por parte do poder.

<sup>16</sup>En Reig Tapia, Alberto. *Ideología e historia: sobre la represión franquista y la Guerra Civil*. Akal. Madrid. 1986.

## Bibliografía

AGUILAR FERNÁNDEZ, PALOMA. *Memória y olvido de la Guerra Civil española*. Alianza Editorial. Madrid, 1996.

ARÓSTEGUI, JULIO. “Tiempo contemporáneo y tiempo presente. Una reconsideración necesaria”, en *Historia del Tiempo Presente: Teoría y Metodología*. ICE. Universidad de Extremadura, 1998.

“El análisis histórico social y la naturaleza de la Historia del Presente”, en *Actas del II simposio de Historia Actual*. Instituto de Estudios Riojanos. Logroño, 2000.

BAS, ENRIC. “Nuevos retos, viejos enfoques: Lanecesidad de repensar las Ciencias Sociales; aportes desde la sociología”, en *Actas del III simposio de Historia Actual*. Instituto de Estudios Riojanos. Logroño, 2002.

CARRERAS ARES, JUAN JOSÉ. *Razón de Historia*. Marcial Pons. Zaragoza, 2000.

BERMEJO BARRERA, JOSÉ CARLOS. *Genealogía de la Historia. Ensayos de Historia Teórica III*. Akal. Madrid, 1999.

CHACÓN GUTIÉRREZ, INMACULADA. “La memoria del presente”, en *Actas del II simposio de Historia Actual*. Instituto de Estudios Riojanos. Logroño, 2000.

COSTA CLAVELL, XAVIER. *Las dos caras de Galicia bajo el franquismo*. Cambio-16. Madrid, 1977.

CRUZ, BENTO DA. *O lobo guerrilheiro*. Ed. Notícias. Lisboa, 1992.

Cuesta Bustillo, Josefina. “Tiempo y recuerdo: Dimensiones temporales de la memoria política (España 1936-2000)”, en *Actas del III simposio de Historia Actual*. Instituto de Estudios Riojanos. Logroño, 2002.

DÍAZ, MARIO P. “Imagen y tiempo presente. Información versus memoria”, en *Historia del Tiempo Presente: Teoría y Metodología*. ICE - Universidad de Extremadura, 1998.

FANDIÑO, ROBERTO G. "La barbarie legitimada. Historia de la propaganda e Historia del Tiempo Presente", en *Actas del III simposio de Historia Actual*. Instituto de Estudos Riojanos. Logroño, 2002.

FERNANDES ALVES, JORGE. *O Barroso e a Guerra Civil de Espanha*. Câmara Municipal de Montalegre, 1981.

FERNANDES DO ESPÍRITO SANTO, DOMINGOS. "Testemunho. O Cambedo e a Guerra Civil" En *A Trabe de Ouro* nº 17. Santiago de Compostela, 1994.

FERNÁNDEZ, CARLOS. *El Alzamiento de 1936 en Galicia. Datos para una historia de la guerra civil*. Edicións do Castro. Sada. 1987 (4ª edición).

FERNÁNDEZ MAZAS, ARMANDO. *Política y Pedagogía (Memoria teórica de un maestro de la A.T.E.O.)* Andoriña. Ourense, 1990.

FERNÁNDEZ DE LA MORA, GONZALO. *El crepúsculo de las ideologías*. Madrid. Espasa-Calpe. 1965.

GARCÍA DE CORTAZAR, FERNANDO. "¿Se puede hablar de Tiempo Presente hoy? ", en *Historia del Tiempo Presente: Teoría y Metodología*. ICE. Universidad de Extremadura, 1998.

GARCÍA MAÑÁ, LUÍS. *La frontera Hispano-Lusa en la provincia de Ourense. Anexo 11 del Boletín Auriense*. Museo Arqueológico de Ourense, 1988.

COUTO MIXTO. *Unha República esquecida*. Universidade de Vigo, 2000.

GODINHO, PAULA. "O grupo de o Juan e a Importancia da rede social". En *A Trabe de Ouro* nº 16. Santiago de Compostela, 1993.

*Memórias de Resistência Rural no Sul. Couço (1958-1962)*. Celta Editora. Lisboa, 2001.

HEINE, HARTMUT. *A guerrilla antifranquista en Galicia*. Xerais. Vigo, 1980.

PRIMO LEVI. *La tregua*. Muchnik editores. Barcelona, 2001.

MARTÍNEZ-RISCO DAVIÑA, LUÍS. *O ensino da Historia no bacharelato franquista (Período 1936-1951)*. Edicións do Castro. Sada, 1994.

Prada Rodríguez, Julio. "Abaixo o fascismo e viva a revolución social" a revolución de outubro na provincia de Ourense", en *Boletín Auriense*, T XXX. Museo Arqueológico Provincial. Ourense, 2000.

RAMÓN CARRIÓN, MANUEL DE e PANIAGUA SANTAMARÍA, PEDRO. "Periodismo, ¿Historia para el futuro?", en *Actas del II simposio de Historia Actual*. Instituto de Estudos Riojanos. Logroño, 2000.

REIG TAPIA, ALBERTO. *Ideología e historia: sobre la represión franquista y la Guerra Civil*. Akal. Madrid, 1986.

ROSAS, FERNANDO (director) *Portugal e a Guerra Civil de Espanha*. Lisboa. 1996.

SALINAS VALENCIA, MÁXIMO. *O Couto Mixto: o seu contorno arráiano e os Pobos Promiscuos. Descrición Socioeconómica*. Asociación de Amigos do Couto Mixto. 2002.

TUSELL, JAVIER. *La España de Franco*. Historia-16. Madrid. 1989.

VVAA. *La Guerra Civil Española 50 años después*. Labor. Barcelona, 1989 (3ª edición).

WOUTERS, MARC. 1936. *Os primeiros días*. Xerais. Vigo, 1993.

